

“Hart Gallery Contemporary Art” a habri su portanan na The Ritz Carlton



ORANJESTAD- Un espacio nobo pa e arte a wordo crea na Ritz Carlton Hotel. Ta trata di “Hart Gallery Contemporary Art”.

Egilda Lartez-Hart, ta e creador di e concepto aki y el a splica cu ta trata di un galeria

den e zona turistico y hopi accesibel na e local como na e turista cu ta bin Aruba di tur parti di mundo.

Na “Hart Gallery” por expone pinturanan Latino Americano, Caribense y tambe di autornan local.

E creacionnan aki ta wordo muestra na e turistanan ya cu pa nan ta resulta hopi atractivo y ta un manera di tin acceso na e tipo aki di obranan di arte.

E galeria ta ubica den e prome piso di Ritz Carlton, cerca di e lobby y nan ta bay cuminsa cu hopi arte contemporaneo. Actualmente tin un serie

di artistanan emergente cu ta hopi interesante y cu ta bal la pena conoce nan y cu kisas di otro manera no tin e posibilidad di yega ne tipo di publico aki.

Banda di esaki tambe ta bay

traha cu artistanan consagra pero ta bay pone enfasis den e artistanan nobo. Ta bay cuminsa cu pinturanan pero tambe lo bay expone esculturanan den un di dos fase.

Lartez-Hart, a laga sa cu prome cu bin biba na Aruba hunto cu su casa, nan a haci un recorrido den varios pais. Di tur e paisnan cu nan a recore nan a gusta Aruba pa habri e galeria pasobra ta un luga unda nan a sinti e cordialidad di su hende y e gentileza. “Nos ta sinti nos mes

na nos propio cas”, el a enfatisa.

“Hart Gallery” tin como meta un intercambio cu e personanan di e isla y pa comparti tur loke tin di haber cu e parti artistico. “No solamente expone e obranan di e artistanan local sino tambe haci un trabao social cu por beneficia algun grupo den necesidad di e comunidad, esaki pa medio di e fondonan crea pa medio di e arte, Egilda Lartez-Hart a duna di conoce”.

“Hart Gallery” ta bay habri oficialmente awe 5 di November cu un ceremonia special y nan ta bay tin e orario di dialuna pa diadomingo, di 10 am te 8 pm. □

